

21 MAR 1999

Sanusi-Konspirasi

SANUSI TOLAK DAKWAAN PM KETUAI KONSPIRASI

ALOR SETAR, 21 Mac (Bernama) -- Menteri Besar Kedah Tan Sri Sanusi Junid hari ini menolak dakwaan sesetengah pihak yang menyifatkan Perdana Menteri Datuk Seri Dr Mahathir Mohamad mengetuai konspirasi menjatuhkan timbalannya Datuk Seri Anwar Ibrahim pada September tahun lalu.

"Konspirasi hanya akan berlaku jika seseorang yang berada di peringkat bawahan cuba menjatuhkan seseorang yang berada di peringkat atasan," katanya ketika memberikan ucapan dalam majlis perjumpaan Perdana Menteri bersama parti-parti komponen Barisan Nasional (BN) Kedah di Dewan Seri Negeri, Wisma Darul Aman di sini.

Yang turut hadir ialah Menteri Kesihatan Datuk Chua Jui Meng, Timbalan Menteri Dalam Negeri Datuk Abdul Kadir Sheikh Fadzir, ahli-ahli exco kerajaan negeri serta ahli-ahli parti komponen BN Kedah.

Sanusi berkata konspirasi tidak akan wujud jika seseorang di peringkat atasan cuba menjatuhkan orang yang berada di bawahnya kerana mereka hanya perlu menggunakan kuasa yang ada untuk memecat sesiapa yang difikirkan perlu.

Beliau yang begitu bersemangat ketika memberikan ucapan turut memberikan contoh bagaimana hasil dari konspirasi yang dilakukan oleh Brutus menyebabkan Julies Caesar telah dibunuh pada zaman kerajaan Rom dulu.

Beliau berkata tuduhan itu adalah tidak berasas dan setiap ahli parti komponen BN mempunyai tanggungjawab untuk memulihkan imej Perdana Menteri dari tuduhan itu.

"Sepatutnya, tiada ahli parti komponen BN merasa puashati apabila Perdana Menteri dikutuk sebegini...dan kita mesti bangun untuk berusaha memasukkan semula perasaan cintakan agama, bangsa dan negara dalam jiwa mereka yang terpengaruh dengan dakwaan itu," katanya.

Katanya, mereka ini ibarat seperti puntung yang sudah terpadam dan jika usaha yang dilakukan ini berjaya, puntung itu pastinya akan menyala semula.

Sanusi berkata tuduhan itu tidak sepatutnya dilemparkan setelah Perdana Menteri menabur banyak jasa untuk membangun dan memajukan negara seperti yang dikecapi ketika ini.

-- BERNAMA

MAN ZB